

Dithero tsa Tirelano mo Kutlwanong

49/2015 Thero ka Sontaga wa 17 morago ga moletlo wa Borarobongwe, e le ka 27. 09. 2015

Mo leineng la Modimo o e leng Rara le Morwa le Mowa o o Boitshepo!

Lefoko le le okamelang beke eno le kwadiilw mo go 1 Joh. 5:4b, le re: **"Tumelo ya rona ke yona e e fentseng lefatshe."**

1. Sefela sa 279 - 261/268

2. Thapelo: Morena, Modimo, Mong-wa-thata-yotlhe, re atamela fa pele ga sefatlhego sa gago le kajeno go utlwa Lefoko la gago. Morena, re ntse re tla go le utlwa, o re abele Mowa o o Boitshepo wa gago gore mo matshwenyegong otlhe a rona, re bone Jesu Mopholosi wa rona, le rona re kuele mo go ene, re kope mo go ene ka tumelo gore o tla re abela tse re di kopang ka bopelotlhomogi jo bogolo jwa gagwe, re kopa jalo ka ntlha ya Morena wa rona Jesu Keresete. Amen.

3. Lefoko la Testamente e kgologolo le kwadilwe mo go Jes. 49"1-6;

Epistolo ka fa thulaganyong ya 2 e kwadilwe mo go Baroma 10:9-18;

Efangele ka fa thulaganyong ya 3 e kwadilwe mo go Mareko 9:17-27.

4. A go ipolelwe tumelo ya bokeresete!

5. Sefela sa 186 - 172/179

6. Thapelo ya mmadi wa thero.

7. Efangele ka fa thulaganyong ya 1 e kwadilwe mo go Matheo 15:21-28, e re: "Foo Jesu a tloga teng, a ya ntlheng ya Tiro le Sitone. Mme teng ga tla mosadi wa Mokanana wa naga eo, a goa a re: 'Nkutilwela botlhoko, Morena, Morwa Dafita! Morwadiake o tshwenngwa thata ke modemone.' Mme a se ka a mo araba ka lefoko lepe. Barutwa ba gagwe ba tla go ene, ba mo rapela ba re: 'Dira gore a tsamae; gonne o re goeletsa morago.' A fetola a re: 'Ga ke a rongwa gope, fa e se kwa dinkung tse di latlhegileng tsa ntlo ya Iseraele.' Ke fa mosadi a tla, a mo obamela a re: 'Morena, nthusa!' Jesu a araba a re: 'Ga go a tshwanela go tsaya senkgwe sa bana go se latlhela ditšwanyana.' Ene a fetola a re: 'Ee, Morena, gonne le tsona

dintšwanyana di a tle di je matlhotlhora a a wang mo tafoleng ya beng ba tsona.' Foo Jesu a mo araba a re: 'Mosadi, tumelo ya gago e kgolo! A go go dirafalele ka fa o eletsang ka teng.' Mme morwadie a fola e sa le ka nako eo." Amen.

8. Thero: Phuthego e e rategang mo Moreneng wa rona Jesu Keresete, re mo sebakeng sa Disontaga tse di latelang moletlo wa Borarobongwe, se e leng sebaka se re lebogang, le go tumisa ka sona Modimo o o Borarobongwe ka ntlha ya ditiro tse dikgolo tse o di re diretseng ka bopelotlhomogi jwa ona. Kajeno ke Sontaga wa 17 morago ga moletlo wa Borarobongwe. Lefoko la thero ya kajeno re le bona mo Efangeleng ya ga Matheo. Mo mafokong ao re bona Morena Jesu a le mo ntlheng ya Tiro le Sitone. Teng koo ga tlhaga mosadi wa Mokanana, e le yo o tlaletsweng, a lela, a re: Nkutilwela botlhoko, Morena, Morwa Dafita! Morwadiake o tshwennga thata ke modemone.

Barategi, ya re Jesu a sa ntse a tsamaya mo lefatsheng, a dira ditiro tse dintsi tsa thata, a fodisa balwetsi ba mefutafuta ya malwetse, a ntsha mewa e e bosula mo go bone ba ba neng ba tsenwa ke yona, a tsosa ba ba neng ba setse ba tlhokafetse. Phuthego, go ntse fela jalo le kajeno. Jesu o sa ntse a dira ditiro tse dintsi tsa thata. **Ka moo Jesu ke Mothusi yo o thata.**

1. A re kopeng mo go ene ka tumelo!
2. A re kopeng mo go ene re se lape!

1. **A re kopeng mo go ene ka tumelo!** Barategi mo Moreneng, mo Lefokong la thero ya kajeno re bona Jesu a kopana le mosadi wa Mokanana. Mme yole e ne e se Mojuta, e se wa morafe wa kwa Iseraele, mme e le wa merafe e mengwe, e ne e le Mogerika, Mosirofenika, ka botsalo. Mosadi yoo a le mo tlalelong e kgolo. Ke a gopola gore o ne a setse a yile kwa le kwa ka ntlha ya go lwalelwa ke morwadie yo o neng a tshwenngwa ke modemone mo go maswe. Ya re a sena go bona gore ga a bone thuso mo go ba bangwe, o ne a utlwa ka ga Jesu, a tla mo go ene. Phuthego, mosadi yoo o bona Jesu, a mo kopa gore a mo thuse ka go kgarametsa modemone yo o neng wa tshwenya morwadie, a re: Nkutilwele botlhoko, Morena, Morwa Dafita! Morwadiake o tshwenngwa mo go maswe ke modemone. Re a utlwa gore Jesu ga a ka a araba mosadi yoo ka lefoko lepe.

Barategi, Jesu ke Mothusi yo o nang le thata, le rona mo ditlalelong le mo matshwenyegong a re tlhagelwang ke tsona, a re kopeng mo go ene ka tumelo!

Bomorwa-rre, bokgaityadiarona, go ntse jang mo go lona? A lo a dumela gore Jesu ke Mothusi yo o nang le thata? Go ntse jang mo ditlalelong tsa rona, mo malwetseng, mo matshwenyegong, a lo kopa mo go ene ka tumelo?

Phuthego, fa re itlhotlhomisa, re tla bona gore re batho ba ba bokoa fela. Bangwe mo ditlalelong tsa bone ga ba bone Jesu, fa e le Mothusi yo o nang le thata, o ka re: Ga ba mo itse, le e seng go dumela mo go ene, le e seng go mo ikanya. Mo tlalelong le mo matshwenyegong a bone ba batla thuso go gongwe, ba ya mo dingakeng, le mo go ba ditaola, ba ya mo baswing ba losika lwa bone.

Badumedi, a go se nne jalo mo go rona. Re bonye Jesu, gape re a mo itse, le go dumela mo go ene. Mo ditlalelong, mo malwetseng, mo dintshong, a re yeng go Jesu, ene ke Mothusi yo o nang le thata. Ee, ke ene yo o nang le thata mo godimo ga ditlalelo tsotlhe tsa rona tse di tlhagang, le tse di ka tlhagang. Ee, phuthego, a le rona re etse mosadi yole yo o neng a le mo tlalelong. Mo bofelong o ne a sa ye go gongwe, le e seng go kopa thuso mo go ba bangwe, mme o ne a bona Jesu, a itse gore ke ene Jesu yo e leng Mothusi yo o nang le thata, a re: Nkutiwele botlhoko, Morena, Morwa Dafita! Ee, Lefoko la Modimo le re: O mpitse ka letsatsi la tlalelo; ke tla go namolela, mme o tla nkgalaletsa. A re utlweng le thuto ya bobedi e e reng:

2. **A re kopeng mo go ene, re se lape!** Barategi, mafoko a bofelo a Lefoko la thero ya kajeno a re bontsha Jesu yo e leng Mothusi yo o nang le thata gore le rona re kope mo go ene, re se lape!

Phuthego, se re se utlwang mo mafokong ao, ke fa mosadi yoo, le fa a bitsa mo go kalo, a ntse a kopa a re: Nkutiwele botlhoko, Morena, o nthuse, Jesu ga a mo araba ka lefoko lepe. Phuthego, fa o gopopla ka go raya gore ke ka ntlha ya eng, fa mosadi yo a sa tlogele fela. Mme mosadi yoo, go na le sengwe se se mo tlhotlheletsang, o tlhotlhelediwa ke tlalelo ya gagwe, gape o kgweediwa ke tumelo ya gagwe. Se re se utlwang ke fa Jesu a araba morago ka gore ga ke a rongwa gope, fa e se kwa dinkung tse di latlhegileng tsa ntlo ya Iseraele, jaaka a setse a buile pele ka fa go kwadilweng ka teng mo go Matheo 10:5-6. Le fa go ntse

jalo, mme yoo ga a ka a didimala, ga a tlogele go bitsa le go kopa, o rapela Jesu, a re: Morena, o nthuse. Jesu a araba, a re: Ga go a tshwanela go tsaya senkgwe sa bana go se latlhela dintšwanyana. Mosadi yoo ga a ka a lapa, a gatelela go kopa, a re: Ee, Morena, gonne le tsona dintšwanyana di a tle di je matlhotlhora a a wang mo tafoleng ya beng ba tsona. Phuthego, tumelo ya ga mme yoo ya fenya Jesu, a mo utlwela mo tlalelong ya gagwe, a mo araba, a re: Mosadi, tumelo ya gago e kgolo! A go go dirafalele ka fa o eletsang ka teng. Mme morwadie a fola e sa le ka nako eo.

Badumedi, go ntse jang mo go rona? A lo tshwarelela mo go kalo mo go kopeng; gongwe fa lo sa bone thuso ka nako e lo kopang ka yona, gongwe lo tla lapa go kopa? A ga lo gopole gore fa ke kopa, ke ka ntlha ya eng, fa ke sa bone thuso? Bomorwa-rre, a go se nne jalo, le kajeno Jesu e sa ntse e le ene, e le Mothusi yo o nang le thata mo ditlalelong tsa rona, mo malwetseng, ee, mo matshwenyegong a a ka nnang a magolo tota, a a ka tlhagang mo go rona. A re kopeng mo go Jesu, re re: Nkutilwele botlhoko, Morena! Morena, o nthuse jaaka mme yole! Ee, le fa re sa bone thuso ka nako e re kopang ka yona, re gopole gore Modimo o re leka mmogo le tumelo ya rona gore a tota re dumela mo go ona? A re o ikanya tota? A re o ikanyeng, le fa re sa bone karabo ka pele, le fa re utlwa mafoko a a utlwalang mo dipelong tsa rona ka gore Morena ga a rate go re thusa. Nnyaya, o leka tumelo, le boitshoko jwa rona fela. A re itshwareleleng mo Lefokong la Morena, le le reng: O a batla, le go rata gore botlhe ba pholosiwe.

Ee, phuthego, Jesu ke ene yo o nonofileng go re thusa le mo tlalelong ya maleo. Ke ene yo o re bogetseng, a re swela mo sefapaanong kwa Golegota. Ee, le kajeno fa re atamela mo go ene, le go kopa gore a re itshwarele maleo a rona, o tla re itshwarela ka bopelotlhomogi jwa gagwe.

Modimo, Rraetsho yo o mo legodimong, a o re thuse rotlhe. Kana re sa ntse re utlwa mafoko a ona, o re abela Mowa o o Boitshepo gore le rona mo ditlalelong, mo malwetseng, le fa e le mo matshwenyegong a maleo le a loso, re bone Jesu yo e leng Mothusi yo o nang le thata, re kope mo go ene, re se lape, re itshwarelele ka metlha. Ke fa le rona re tla utlwa Lefoko le le gomotsang, le le reng: O! Tumelo ya gago e kgolo. A go go diragalele ka fa o eletsang ka teng. A Modimo o re abele tseo ka bopelotlhomogi jwa ona. Amen.\

9. Thapelo: Morena, Modimo, Rraetsho yo o mo legodimong, re a leboga, re lebogela Lefoko le le boitshepo la gago, le re tswang go le utlwa le kajeno. Morena, o re thuse gore le rona mo ditlalelong tsa rona re go bone, wena Jesu, Mopholosi wa rona yo o nang le thata e e fetang ditlalelo tsotlhe tsa rona. O re thuse gore re go kope ka tumelo, re se lape. Morena, le jaanong re a kopa gore o re itshwarele maleo otlhe a rona, Morwa Modimo yo o rategang Jesu Keresete, Mopholosi wa rona. Amen. Thapelo ya Morena: Rara wa rona yo o mo legodimong ...

10. Sefela sa 287 - 271/277

A kagiso ya Modimo e e fetang tlhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke F. J. Mtshali, ka ngwaga wa 2009.

Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.